

1 PEDRO

Apostol Pedrupa punta cag cartan

Cay cartataga apostol Pedrum gellgargan. Payga Señor Jesuswan purirmi yachatsicungancunata wiyargan y milagru rurangancunata ricargan. Tsay ricangancunata y wiyangancunata willacunanpämi Pedruta Señor Jesus acargan. Tsaynö acrashga captinmi Pedruta “apostol” niyan. Pedrupita masta musyayänayquipä liyinqi Juan 1.40-44; Lucas 5.1-11; Marcos 8.27-33; 9.2-8; Mateo 14.22-33; Marcos 14.66-72; Juan 21.15-19; Hechos capítulo 2-pita 5-yag; 8.14-25; 10.1-pita 11.18-yag; 12.1-19; 1 Corintios 9.5; Galatas 2.6-16.

Romachö caycarmi Pedroga cay cartata gellgargan maytsaychöpis criyicog mayincunapä. Señor Jesucristuman criyicuyanganpita imachö ñacarpis payllaman yäracuyänanpämi cay cartata gellgargan.

Pedrupa saludacuynin

1 ¹Ponto, Galacia, Capadocia, Asia, y Bitinia provinciacunachö criyicog mayicuna:

Noga Pedro, Señor Jesucristupa *apostolnin carmi, cay cartata gamcunaman cartacamü. Maytsay marcapita carpis gloriaman aywarga juntacashgam cashun.

²Waugicuna panicuna, gamcunata manarä yuricuyaptiquim Tayta Dios acrayäshurgayqui perdonar salvayäshunayquipä. *Espiritu Santutam gamcunaman cachamushga Señor Jesucristuta chasquicur pay munangannö cawayänayquipä. Tsaynöpam perdonashgana cayanqui Señor Jesucristo gamcuna raycur yawarninta jichar wanunganpita.

Tayta Diosllantsic cuyapäcog cayninwan imaypis yanapaycuyäshuy

pay munangannö cushishga cawayänayquipä.

Criyicogcuna imaypis cushishga cawayänanpä Pedro ningan

³iTayta Diosllantsic y Señornintsic Jesucristo alabashga caycullätsun! Cuyapäcog cayninwanmi mushog cawayta gollämarguntsic yapay yuricushganöna canantsicpä. Cananga Señor Jesucristo cawamushga captinmi musyantsic nogantsicpis wanungantsicpita cawarcamur gloriaman chänantsicpä cagta.

⁴Gloriaman charmi Tayta Dios shuyaraycätsimangantsic herenciata chasquishun. Tsay herenciaga manam imaypis ushacantsu ni ismuntsu ni illacantsu. ⁵Jesucristuman criyicur yäracuyaptiquim Tayta Dios yanapaycuyäshunqui pay munangannö cawayänayquipä. Tsaynöpam Señor

Jesucristo cutimuptin tsay herenciata chasquiyankui.

⁶iTsaynō caycaptinga cushicuyay! Cay patsachō ñacarpis gloriaman chaycurga mananam ñacashunnatsu. ⁷Imayca ñacaycunawanran Tayta Dios tantiyatsimantsic payman masrā criyicunantsicpä. Örupis tsullurrä öru püruman tigragnō nogantsicpis ñacaycunawanran tantiyacuntsic llapan shonguntsicwan Tayta Diosman yäracunantsicpä cagta. Tsaynō imayca ñacaychō carpis Tayta Diosman mana ajayaypa yäracushgaga Señor Jesucristo cutimur cushishgam goricamāshun.

^{8,9}Señornintsic Jesucristuta mana ricashga caycarpis payman criyicurmi gamcunaga cāsucur cawaycāyanqui. Tsaymi imayca ñacayta päsarpis gloriaman aywayānayquipä cagtana musyar cushishga caycāyanqui.

^{10,11}Tayta Dios cay patsaman salvamagnintsic Jesucristuta cachamunanpä cagtaga unay willacognin *profëtacunapis willacuyargannam. Espiritu Santum paycunata musyatsirgan Señor Jesucristo ñacar wanunanpä cagta y cawarcamur imaycawan munayyog cananpä cagta. Espiritu Santo tsaynō musyatsiptinnam profëtacunaga musyayta munayargan Jesucristo imay shamunanpä cagtana. ¹²Tsaynam Espiritu Santoga paycunata musyatsirgan unaytarä shamunanpä cagta. Señor Jesucristo shamushgana captinmi cananga Espiritu Santupa munayninwan willacogcuna willacuycāyan Jesucristo salvamagnintsic canganta. Tsay willacuyninta chasquicur salvacungantsicta musyarmi *angelcunapis cushicushga caycāyan.

Jutsata manana runanantsicpä Tayta Dios perdonamangantsic

¹³Tsaynō captinga alli yarpayniquicunawan Tayta Dios munangannōmi cawayānayqui. Ama gongayanquitsu Señor Jesucristo cutimur Tayta Diospa ñöpanman goricuyāshunayquipä cagta. ¹⁴Tayta Diospa wamran caycarga pay ningancunatam cāsucuyānayqui. Señor Jesucristuta manarä chasquicur cawayangayquinöga amana cawayanquitsu. ¹⁵Tsaypa rantinga Tayta Dios ima jutsaynag cangannō gamcunapis llutancunata mana ruraypa cawayay. Tsaynōna cawayānayquipämi Tayta Dios perdonar salvayāshurguyqui. ¹⁶Tayta *Diospa palabranpis caynōmi gellgaraycan: “Jutsata mana ruraypa noga cawangänō gamcunapis jutsaynag cawayay” nir.

¹⁷Tayta Diosga llapan runacunatapis imanō cawanganmanmi juzganga. Tsaymi Tayta Diosta “Papällay” nicarga cay cawayniquicunachō pay ningancunata cāsucur cawayānayqui. ¹⁸Tayta Diosta mana cāsucog unay runacunanō gamcuna cawaycāyaptiquipis Tayta Diosga cuyapāyāshurmi salvayāshurguyqui. Tsaynō salvayāshurniqui manam gellëwantsu ni öruwantsu gamcunata rantiyāshurguyqui. ¹⁹Payga rantir salvayāshurguyqui jutsaynag tsurin Jesucristupa yawarninwanmi. Jesucristoga *Pascua fiestachō carnishta pishtayangan cuentan nogantsic raycur wanushga. ^a ²⁰Señor Jesucristo wanuyninwan nogantsicta salvamānantsicpä cagtaga Tayta Dios nirgan cay patsata manarä camarmi.

a 1.19 Pascua fiestachō pishtayānanpä cag carnishman Señor Jesucristo iwalatsishga canganta musyanayquipä liyniqui Exodo 12.1-13 y 12.21-23.

Tsay ningannöllum Jesucristo shamushga salvamarnintsic.

²¹Jesucristuta wanunganpita Tayta Dios cawarcatsimurmi ciëluman goricushga. Tsaynömi gamcunatapis Tayta Dios cawarcatsiyämushur ciëluman goricuyäshunqui. Tsayta musyarnam gamcunaga imayca ñacaychö carpis payllaman yäracuyanqui.

²²Gamcuna alli willacuyñinta chasquicuyaptiquim Tayta Dios perdonayäshurguyqui cuyanacur cawayänayquipä. Tsaynö caycaptinga llapayquipis juc shongulla cuyanacur cawayay criyicog mayiquicunawan.

²³Gamcuna tsaynö cuyanacur cawayänayquipämi mushog cawayta chasquiyarguyqui yapay yuricushga cuenta. Mamayquicunapita taytayquicunapita yuricurmi cay patsachö ushacäreglla cawaytaga chasquiyarguyqui. Canan mana ushacag cawaytam itsanga Tayta Diosna goyäshurguyqui willacuyñinta chasquicuyangayquipita. Tsay chasquicuyangayqui alli willacuyga imayyagpis caycangallam. ²⁴Tsaynö cananpä cagtaga Tayta Diospa palabran gellgaranganchöpis nicanmi:

“Runacunapa cawayñincunaga gewanöpis ushacäregllam.

Mayläya tuctuycarpis gewapa waytan upiregnöllum caycäyan. Gewa tsaquiriptinga waytanpis shushurinmi.

²⁵Tayta Diospa willacuyñinmi itsanga imayyagpis caycangalla”.

Tsay alli willacuyñintam gamcunata willapäyashurgayqui canan salvashga cayänayquipä.

2 ¹Nagana Tayta Diospa willacuyñinta chasquicushga caycarga llutan ruraycunata

dejaycuyayna. Janan shongullaga pitapis ama alli tupäyaytsu. Ama llullacuyaytsu, ama chiquinacuyaytsu, ni cuentu puritseg cayaytsu.

^{2,3}Señornintsic Jesucristo cuyapäcog canganta musyaycarga llullu wamra alläpa gustapäcur mamanta chuchungannö gamcunapis llapan shonguyquicunawan Tayta Diospa willacuyñinta yachacuyay. Tsaynöpam Tayta Dios munangannö imaypis cawayanqui.

Tayta Diospa templun cangantsic

⁴Tsaynö caycaptinga Señor Jesucristuman criyicur cawayay. Señornintsicta runacuna wanutsiyashga caycaptinpis Tayta Diosmi paytaga churashga imaycawan munayyog cananpä. Payga templupa cimientunchö mayistra rumi cuentam caycan.

⁵Tsaynam cananga Jesucristuman criyicogcuna Tayta Diospa täcunan templunna caycantsic. Tsay shumag templunmanmi churamarguntsic sirvegnin *sacerdötöcunanö canantsicpä. Llapantsic sirvegnincuna carnam ima ñacaychö carpis Señor Jesucristuta cäsucur cawaycantsic.

⁶Tsaytaga Tayta Diospa palabran gellgaranganchöpis caynömi nican:

“Jerusalen marcamanmi noga juc runata cachamushä mayistra ruminö cananpä.

Tsaynö captin payman criyicogcunaga Tayta Dios mana rechazaypam chasquina”.

⁷Criyicog cagcunapäga ima cushicuymi Señor Jesucristo salvamagnintsic cangan. Mana criyicogcunam itsanga salvacog canganta mana imapäpis cuentayantsu.

Tsaynö captin Jesucristo mayistra rumi cuenta cangantaga Tayta Diospa palabbranchö maspis caynömi gellgaraycan:

“Wayi sharcatsēcuna ‘Cay rumega manam imapāpis välintsu’ nir jitariyangantam juc alli albañilga mayistra rumimanrā tīcraratsin” nir.

⁸Nircur maspis Señor Jesucristupāga caynömi nican:

“Payga ishquitsicog ruminömi caycan”.

Runacuna rumichö tincacar jegacurpungannömi Tayta Diospa willacuyñinta mana cāsucogcunaga infiernuman gaycucāyanga. Infiernuman gaycucāyānapā cagtaga Tayta Dios imaypitapis nirgannam.

⁹Gamcunam itsanga Tayta Diospa acracuynin car salvashgana caycāyanqui. Sacerdötīcunata Tayta Dios *templunchö sirviyānapā acrangannömi gamcunatapis acrayāshurguyqui pita maytapis alli cayñinta musyatsiyānayquipā. Israel nacion runacuna Tayta Dios munangannö cawayānapā acrashga cayangannömi gamcunatapis acrayāshurgayqui pay munangannö cawayānayquipā. Gamcunaga acrashga cayanqui salvamagnintsic canganta willacuyānayquipāmi. Tsaynöpam jutsa rurayniquicunawan tsacāpacushganö cawayangayquipita alli cawayman tīcracur atsicaychönöna cushishga cawaycāyanqui. ¹⁰Puntacunataga gamcuna manaran Tayta Diospa wamrancunarätsu cayarguyqui. Cananmi itsanga criyicur wamrancunana cayanqui. Puntacunata

manarā criyicurga jutsa rurayniquicunapita manam perdonashgatsu cayarguyqui. Canan criyicuyaptiquinam itsanga Tayta Dios perdonar salvayāshurguyquina.

¹¹Waugicuna panicuna, gloriaman aywanantsicpā captinmi cay patsachöga llapantsicpis gorpa cuentalla caycantsic. Gloriachöna tācunantsic captinnam llutan ruraycunapā shonguyquicuna yarpaptinpis mana cāsüpāyānayquitsu.

¹²Rimayāshuptiquipis Señor Jesucristuman mana criyicogcunata mana ajanaypam alli ricayānayqui. Tsaynö cawayangayquita ricarmi contrayquicuna caycāyanganpita tantiyacurnin Jesucristuman criyicuyanga. Y Señor Jesucristo cutimunan junagmi salvashga cawayanganpita paycunapis Tayta Diosta alabayanga.

Autoridācunata cāsucunantsicpā yätsingan

¹³Tayta Dios ningancunata cāsucurga llapan autoridācunatapis cāsuyānayquim. Atsca nacioncunata mandunchö catseg reycunatapis cāsucuyānayquim. ¹⁴Tsaynömi tsay reycuna churangan cagtapis autoridācunataga cāsucuyānayqui. Autoridācunaga cayan mana alli ruragcunata castigayānapāmi y alli ruragcunata valoratsiyānapāmi. ¹⁵Tsaynömi ari Tayta Diosga munan autoridācunata shumag cāsucuyānayquita. Tsaynö allillata rurar cayaptiquega Tayta Diosta mana cāsucog llutan runacuna manam rimayāshunquinatsu.

¹⁶Jutsa ruraychö cawayangayquipitam Tayta Dios jipiyāshurguyqui paypa maquinchöna cayānayquipā. Maquinchöna caycarga ama yarpāyaytsu jutsata rurayānayquipā

libri cayangayquita. Tsaypa rantinga Tayta Diospa munayninchöna allita rurar cawayay. ¹⁷Tsaynöna cawarnin llapan runacunatapis respëtuwan ricayay. Criyicog mayiquicunawan cuyanacuyay. Tayta Diosta mantsacur cäsucuyay. Y mandacog reycunatapis respitacuyay.

**Empliyäducuna patronninta
cäsucuyänapä yätsingan**

¹⁸Empliyäducuna, patronniquicuna alli runa captinpis o feyu runa captinpis respitacuyay. ^{19,20}Mana alli portacuyangayquipita patronniquicuna castigayäshuptiqui quiquiquicunapa cuentayquicunapitam ñacaycäyanqui. Alli portacuycäyaptiquipis patronniquicuna castigayäshuptiquega ama resenticuyanquitsu. Mana resenticuyapa awantacurga allitam ruraycäyanqui. Tsaynö pacenciacuyänayquitam Tayta Diosga munan. ²¹Tsaynö ñacarpis mana resenticuyapa Tayta Diosman criyicuyaptiquim perdonar salvayäshurguyqui.

Señor Jesucristupis mana resenticuyapa nogantsic raycurmi ñacargan. Tsaymi yarpätsimantsic nogantsicpis tantiyacunantsicpä imayca ñacayta päsarpi mana resenticuyapa canapä.

²² “Payga manam ima jutsatapis rurargantsu, ni imatapis manacagcunataga parlargantsu”.

²³Runacuna ashlliyaptinpis payga upällacurganmi. Ñacatsiyaptinpis payga poderösu caycar manam jurapargantsu. Tsay jurapänapa rantinga Tayta Diospa maquinmanmi dejaycorgan payna juzgacunanpä.

²⁴Jutsantsiccunapita perdonashga canantsicpämi Señor Jesucristo cruzchö ñacar wanurgan. Señornintsicga wanurgan jutsa rurayta jagirir Tayta Dios munangannöna cawanantsicpämi. Tsaynö ñacar wanuyninwanmi imayca antsa geshyagta allitsegnöpis salvamarguntsic. ²⁵Puntacunataga carguntsic mitsegniynag üshacuna maytsaypa mashtacashganömi. Cananmi itsanga cuyamagnintsic Señor Jesucristo gorimarguntsic paypa maquinchöna canantsicpä. Üsha mitsicog runa üshanta shumag ricangannömi payga alli ricallämantsic Tayta Diospa ñöpanman chänantsicpä.

**Majayogcuna alli cawayänapä
yätsingan**

3 ^{1,2}Warmicuna, gowayquicunata cäsucuyay Señor Jesucristuman mana criyicog captinpis. Tsaynö gowayquicunata cuyar cäsucuyaptiquega Tayta Diospa willacuyñinta mana willapaycäyaptiquipis tantiyacur criyicuyangam.

³Ama yarpachacuyanquitsu agtsayquicunata tucuyñöpa allitsapäcur cayänayquipä cagta. Tsaynö ama yarpachacuyanquitsu imayca adornacunata ni alläpa chaniyog röpacunata jaticuyänayquipä cagcunallataga. ⁴Tsaypa rantinga yarpachacuyay piwanpis maywanpis alli cawayänayquipä cagta. Tsaynö alli cawayangayquim Tayta Diospäga mas välin imaycawan adornashga cayangayquipitapis.

⁵Unaycunapis Tayta Diosta cäsucur cawag warmicunaga manam adornacuyäpä cagcunallataga yarpachacuyagtsu. Paycunaga yarpachacuyag Tayta Diosman yäracur gowancunapa munayninchö

cawayänanpä cagtam. ⁶Tsaynömi unay Sarapis gowan *Abrahamta cäsucurnin respëtuwan ricargan. Sara gowanta respitar cawangannö cawayänayquitam Tayta Diosga munan. Tsaynö allita rurar cawarnaga gowayquicunapita imachöpis manam mantsacuyanquinatsu.

⁷Ollgucuna, gamcunapis warmi quicunawan shumag cuyanacur cawayay. Warmi quicuna gamcunapa callpay quicunawan mana iwalag caycaptinga shumag ricayay. Ama gongayaytsu warmi quicunapis y gamcunapis Señor Jesucristuman criyicuyangayquipita Tayta Dios mushog cawayta taritsiyäshungayquita. Warmi quicunawan shumag mana cawayaptiquega imata mañacuyangayquitapis Tayta Dios manam wiyayäshunquitsu.

**Jesucristuman criyicog
mayintsiccunawan alli
cawanantsicpä yätsingan**

⁸Tsaynö captin llapayquipis juc shongulla cuyapänacur yanapanacur cawayay. ⁹Runa mayi quicuna chiquiyäshuptiquipis gamcunaga ama chiquiyanquitsu. Ashllyiäshuptiquipis ama ashllyianquitsu. Tsaypa rantinga Tayta Dios cuyapäcog cangannö gamcunapis chiquiyäshogcunapä Tayta Diosman mañacuyay yanapaycunapä. ¹⁰Tsaytam Tayta Diospa palabran gellgaranganchöpis caynö nican:

“Pipis alli cawayta munarga
llutancunata mana parlaypa
mana llullacuypa cawatsun.

¹¹Llutancunata rurananpa rantinga
allicunata rurar cawatsun.

Tsaynölla piwan maywanpis
shumag cawayätsun.

¹²Tayta Dios cäsucogcunataga
ricaycanmi y yanapaycanmi.

Llapan mañacuyangantapis
wiyaycanmi.

Peru llutan ruragcunataga manam
ricaytapis munantsu”.

**Allita rurangantsicpita ñacarpis
mana llaquicuypa cawanantsicpä
yätsingan**

¹³Gamcuna alli rurayllachö
cawayaptiquega pipis maypis
respitayäshunquim. ¹⁴Tayta Dios
munangannö allita rurar
cawacuyangayquipita runacuna
chiquiyäshuptiqui Tayta Diosmi
premiuta goyäshunqui. Tsaynö
caycaptinga ama pitapis
mantsacuyanquitsu ni imapitapis
llaquicuyanquitsu.

¹⁵Llaquicuyänayquipa rantinga
Señornintsic Jesucristuman criyicur
paypa munayninman dejaycuyay.

Imaypis listulla caycäyanqui pipis
imanir Jesucristuman criyicuyangayquita
tapuyäshuptiqui tantiyatsiyänayquipä.

¹⁶Peru tantiyatsiyanquega alli
shimillay quicunapa parlaparnin. Tsaynö
runa mayi quicunawanga imaypis
shumag cawayay. Señor Jesucristuman
criyicur cawayaptiquega wasay quicuna
rimagcunapis llutancunata
parlaycäyanganta tantiyacusquir
pengacuyangam. ¹⁷Tayta Dios
munangannö cawarga ñacarpis allitam
ruraycäyanqui. Mana alli ruraypita
ñacarga quiqui quicunapa
cuentay quicunapitam ñacaycäyanqui.

¹⁸Señor Jesucristupis jutsaynag
caycarmi cruzchö wanurgan llapan jutsa
ruraynintsiccunapita perdonamarnintsic.
Tsaynö wanurpis cawamurgan Tayta
Diospa ñöpanman pushamänantsicpämi.

¹⁹Tsaynö cawamunganpitanam
*supaycunata willargan
vincicäyashgana cayanganta.

²⁰Tsay supaycunaga Tayta Diosta mana cäsucurmi *Noe cawanan witsanpis maytsay runacunata munaynincunachö catsiyargan. Tsay witsanpis runacuna llutancunata rurayaptin manam jinan öratsu Tayta Dios castigargan, sinöga shuyarargan Noe büquitanö *arcata^b rurar ushanganyagran. Tsaypitaga arcaman yaycog puwag (8) runacunallam *diluviuwan ushacäcuypita salvacuyargan. ²¹Tsay arcata yacu aynatsiptin runacunata Tayta Dios salvangannömi nogantsictapis salvamantsic Señor Jesucristuman criyicur bautizacushgaga. Bautizacuntsicga manam cuerpuntsic limpiu cananllapätsu, sinöga jutsa ruraynintsicta jagirir Tayta Dios munangannöna cawanapämi. Nogantsicga bautizacur salvacurguntsic Señor Jesucristo wanunganpita cawamushga captinmi. ²²Cananga cawarcamur ciëlumanmi cuticushga y Tayta Diospa derëcha cag lädunchömi caycan. Tsaychöga llapan angelcunam Señornintsic Jesucristupa ñöpanman gonguricuycur adoraycäyan.

**Jutsa ruraychö manana
cawanantsicpä yätsingan**

4 ^{1,2}Nogantsic raycur Señor Jesucristo imayca ñacayta päsashga caycaptinga gamcunapis listum cayänayqui imayca ñacaycunata päsayänayquipä. Jesucristuman criyicurnaga jutsa ruraypä shonguncuna yarpaptinpis manam rurayannatsu, sinöga Tayta Dios munangallanta rurarnam imaypis cawayan. ³Puntacunataga Tayta Diosman manarä

criyicur gamcunapis waquin runacunanöllum jutsa ruraychö cawacuyarguyqui. Tsaynö cawarnin mana pengacuyta jucwan jucwanpis jutsa rurayllachömi cacuyarguyqui. Tsaynömi cayarguyqui mana alli yarpaycunachö, alläpa upyallachö, upyacurcur llutan ruraycunachö, y *idulucunatapis adoraychö. Tsaynö puntacunata cawashga carpis cananga amana tsaynö cayaynatsu.

⁴Jutsa rurayniquicunata jagirir paycunawan mana juntacäyaptiquinam tsay mana criyicog amiguyquicunaga wasayquicuna rimayan. Tsaynö rimayäshuptiquipis ama llaquicuyaytsu. ⁵Tsay runacunaga jutsa ruraynincunata mana dejaypa cawayanganpitam cuentata goyanga Señor Jesucristo llapan runacunaman juzgag shamunan junag. Señornintsicga cawaycagcunatapis juzgangam y wanushgacunatapis sharcarcatsimurmi juzganga. ⁶Tsaynö llapan runacunapis juzgacäyänanpä captinmi Tayta Dios alli willacuyñinta willacogcunata cachaycan. Tsay willacuyta chasquicogcunaga wanurpis Tayta Dios cawarircatsimuptinmi ñöpanchöna cawayanga.

**Espiritu Santo munangannö
yanapanacunantsicpä yätsingan**

⁷Cay patsa ushacänanpä tiempoga cercanam. Tsaynö caycaptinga imaypis mana gongaypa Tayta Diosman mañacuyay pay munangannö cawayänayquipä. ⁸Tsaynöllä alli yarpayniquicunawan cuyanacur imaypis cawayay. Rasunpa cuyanacurga imapita rimanacurpis perdonanacuyänayquim. ⁹Pipis wayiquicunaman chämuptin

b 3.20 Arcaga jatuncaray atsea cuartuyog büquim cargan. Noe rurangan arcamanmi Tayta Dios ningannö ashmacuna yaycorgan diluviuwan mana ushacäyänanpä. Tsaypita masta musyanayquipä liyinqi Genesis 6.9-pita 9.17-yag.

mana parlacachaypa päsatsir
jamaycatsiyanqui.

¹⁰Tayta Diosga llapayquitapis
gracianta goyëshurguyqui jucniqui
jucniquipis yanapanacur paypa
munayninchö cawayänayquipämi.
Tsaynö caycaptinga Tayta Dios alli
cayninwan yanapayëshungayquinölla
gamcunapis yanapanacuyay. ¹¹Tayta
Dios alli willacuyñinta willacog
cayänayquipä churaycäyëshuptiquega
quiquin willacucagnörä willacuyay.
Runa mayiquicunata yanapayänayquipä
Tayta Dios churaycäyëshuptiquega
llapan voluntäniquicunawan yanapayay.
Tayta Diospa willacuyñintaga
willacuyay, waquinta yanapayay
runacuna Señor Jesucristuman criyicur
Tayta Diosta cushishgarä alabayänanpä.

iTayta Diosga imaycawanpis
munayyogmi!

iPayga imayyagpis alabashga
caycullätsun! Amen.

**Jesucristuman criyicogcuna
ñacarpis cushishga cawanantsicpä
yätsingan**

¹²Waugicuna panicuna, Señor
Jesucristuta chasquicuyangayquipita
ima ñacaychö carpis ama llaquicuyaytsu:
“¿Imanirrä caynö jinanpa ñacaycü?”
nirnin. ¹³Tsaynö ñacar
wamayäyänayquipa rantinga cushicuyay
Señornintsic Jesucristo ñacangannö
ñacarpis. Tsaynö ima ñacaychö carpis
mana ajayaypa payman yäracurga cay
patsaman chipipirä cutimunan junag
imanörä cushicuyanqui. ¹⁴Jesucristuman
criyicog cayangayquipita runacuna
ashlliyëshuptiquipis cushicuyay. Tayta
Diospa Espiritu Santun gamcunawanmi
caycan imaypis yanapayëshurniqui.

¹⁵Runa mayiquicunata
wanutsiyangayquipita, suwacog

cayangayquipita, imachöpis
llutancunata ruratsiyangayquipita, o
imatapis mana allita rurayangayquipita
ñacaychö carga pengacuyypämi
caycäyanqui. ¹⁶Señor Jesucristuman
criyicuyangayquipita imachöpis ñacarmi
itsanga mana pengacuyänayquitsu.
Pengacuyänayquipa rantinga criyicog
cayänayquipä acrayëshungayquipitam
Tayta Diosta alabayänayqui.

¹⁷Criyicog cangantsicpita ñacanantsicpä
tiempoga janantsicchönam. Nogantsic
criyicogcunapis ñacaycashgaga Tayta
Diospa alli willacuyñinta mana
chasquicogcunarächir iima jinanparä
infiernuchö ñacayangaga! ¹⁸Tayta Diospa
palabran gellgaranganchöpis tsaytaga
caynömi nican:

“Tayta Diosta cäsucur cawagcunapis
ñacarrä salvacuycäyaptinga
tsay mana cäsucogcunarächirga
iimanörä infiernuchö
ñacaycuyangaga!” nir.

¹⁹Tsaynö cananpä caycaptinga Tayta
Dios munangannö cawagcunaga imanö
ñacarpis ama llaquicuyaytsu. Tsay
llaquicuyänayquipa rantinga camacog
Tayta Diospa maquinman dejaycuyay.
Payga imaypis yanapamänapä
ningannöllum mana dejaypa
yanapaycämantsic.

**Yachatsicogcuna imanö
cayänanpä yätsingan**

5 ¹Cananga, yachatsicog waugicuna,
gamcunata yätsimü nogapis
yachatsicog carmi. Señor Jesucristo
ñacangancunataga noga ricargömi. Pay
ciëlupita cutimurmi llapantsictapis
goricamäshun. Tsaymi gamcunata caynö
yätsimü: ²Üsha mitsicogcuna
üshancunata shumag mitsicungannö
gamcunapis criyicog mayintsicunata

shumag ricayay. Señor Jesucristuman criyicogcunata yachatsiyānayquipä Tayta Dios churaycäyāshuptiquega shumag voluntāwan yachatsiyay. Ama yachatsicuyaytsu pägapä raycullarga, sinöga yachatsicuyay Tayta Diosnintsic munangannö.

³Criyicog mayintsiccunata munayniquicunachö ama catsiyaytsu. Tsaynö quiquiquicunapa munayniquicunachö catsiyānayquipa rantinga Tayta Dios munangannö quiquiquicunarä shumag cawayay. Tsaynö alli cawagta ricayāshurrämi criyicog mayintsiccunapis Tayta Dios munangannöga cawayanga. ⁴Alli yachatsicog cayaptiquega maquinchö catsimagnintsic Señor Jesucristo cutimurmi ñöpanchö imaypis catsiyāshunqui cushishgallata.

**Tayta Diospa munayninchöna
cawanantsicpä ningan**

⁵Jövincunapis jipashcunapis, Diospa palabranta yachatsicogcunata cäsucuyay. Tsaynölla llapayquipis criyicog mayiquicunawan mana yachag tupānacuypa respitanacuyay.

“Tayta Diosga manam yanapantsu pitapis yachag tucogcunataga. Payga imaypis yanapan llānu shonguyog mana parlacachag runacunatam”.

⁶Tsaynö captin mana musyag tucuyya Tayta Diostaga cäsucuyay. Tsaynö cayaptiquega Tayta Dios imaypis allim ricayāshunqui. ⁷Tayta Dios yanapacog caycaptinga maquinman dejaycuyay imayca llaquicuyniquicunatapis. Payga imaycay örapis manam gongaycuyāshunquitsu.

⁸*Satanaspita alcäbu cacuyay. Tsay mana allega imayca mallagashga leonnömi maytsaychöpis puriycan pitapis maytapis jutsaman ishquirpatsinanpä. ⁹Tsaynö caycaptinga gamcuna Satanaspitaga alcäbum cacuyānayqui. Tayta Diosman yäracullar cawayaptiquega manam jutsaman ishquitsiyāshunquitsu. Gamcuna ñacayangayquinöllum maytsaychöpis criyicog mayintsiccuna ñacaycāyan. Tsaymi gamcuna mayläya ñacarpis mana dejaypa Señor Jesucristuman yäracuyānayqui.

¹⁰Jutsa ruragcuna infernuman aywayānan caycaptinmi Tayta Dios cuyapācog cayninwan Señor Jesucristuta cachamurgan wanunanpä. Tsaymi cay caway vīdachö ñacashgapis, Jesucristuman criyicuyangayquipita Tayta Dios gloriaman yaycatsiyāshunqui imaypis manana ñacaypa cawacuyānayquipä. ¹¹Tayta Dios imaycawan munayyog canganpita imaypis alabashga caycullātsun. Amen.

Cartapa ushanan

¹²Waugintsic Silvanuwanmi^c cay cartata cartacayāmü. Payga Tayta Dios munangannömi imaypis cawan. Cay cartāchö gamcunata nimü imayca ñacaycunaman chāyaptiquipis Tayta Dios mana dejaypa yanapaycāyāshungayquita tantiyacuyānayquipämi.

¹³Cay Roma marcachö criyicog mayintsiccunam llapayquipä salūduncunata apatsicayāmun. Tsaynömi cuyangä waugintsic Marcospis salūdunta apatsicamun.

¹⁴Llapan criyicog mayintsiccunawan macallapānacur saludanacuyay. Señor Jesucristuman criyicogcunapä alli cawacuy caycullātsun.